

弘

簡

錄

弘簡錄卷九十

明刑部員外郎仁和弘齋邵經邦學

皇清翰林院侍講學士四世孫遠平校閱

天王 宋一之七

哲宗皇帝諱煦神宗第六子母德妃朱氏以熙寧九年十二月七日己丑生赤光照室初名儲授檢校太尉天平軍節度使封均國公元豐五年遷開府儀同三司彰武軍節度使進封延安郡王七年三月侍宴於集英殿羣臣見王天表粹溫進止中度宰相而下皆再拜賀神宗寢疾三省密院入見王珪等乞早建儲爲宗廟社稷計神宗首肯先時東宮常有赤光至是益熾如火戊戌卽位柩前時年十歲己亥大赦天下除常所不原庚子尊皇太后爲太皇太后皇后爲皇太后朱氏爲皇太妃珪爲山

陵使甲寅羣臣固請始同太皇太后聽政令中外避太后父諱
以后生日爲坤成節帝生日爲興龍節庚申進封顯楊王穎荊
王並加太保贊拜不名佶遂寧必大寧俱咸寧似普寧皆郡王
宗晟宗瑗宗愈宗隱宗綽並爲開府儀同三司進王珪太師曹
僧太保文彥博司徒王安石司空餘進秩并賜資諸軍有差夏
四月丙寅初御紫宸殿甲戌加李乾德同中書門下平章事董
道檢校太尉詔曰先皇帝臨御建立政事以澤天下而有司奉
行失當幾於煩擾或苟且文具不能布宣實惠其申諭中外協
心奉令以稱先帝惠安元元之意丁丑召呂公著侍讀論中書
樞密議事都堂邊事稍重者同議以進遵先帝遣官察舉諸路
監司之法按察司所至有才能顯著者以名聞五月資政殿學
士司馬光自洛入臨首請開言路詔百官及中外臣庶許直言

朝政闕失民間病苦於是上書者以千數甲辰作受命寶丙午京師地震丙辰賜進士劉達等四百六十一人九月戊戌請蓋於南郊己亥上寶冊於福慶殿冬十月癸酉倣唐六典置諫官令侍從各舉二人監察御史兼言事殿中侍御史兼察事命有司均寬民力或致廢格者監司御史糾劾之乙酉葬永裕陵十一月丁酉祧翼祖祔神主於太廟廟樂曰大明之舞蜀民緣山陵役者賦十二月開經筵詔執政侍臣講魯論讀三朝寶訓又罷沅州增修堡砦罷太學保任同罪復以鮮于侁爲京東轉運使貶呂嘉問知淮陽軍邢恕知隨州是歲日有五色雲者六白虹貫日者二河決大名遣使告哀告卽位賀生辰正旦及遺留物於遼遠遣人來祭弔賀卽位生辰正旦皆如故事夏國遣使進助山陵馬國母喪遣使弔祭蕃官高福供奉王英戰死官其

子孫

元祐元年春正月庚寅朔改元太皇太后臨朝詔立神宗原廟
修實錄戊午甘露降二月辛酉遣韓絳安撫賑河決流民臺諫
交論蔡確章惇罪閏月庚寅罷確轉司馬光尙書左僕射兼門
下侍郎呂公著門下侍郎時青苗免役將官之法猶在西戎議
未決光與公著同心輔政命韓維呂大防孫永范純仁詳定役
法罷免役錢諸色差役皆如舊額其見在役錢撥充州縣常平
惟額外寬剩二分許著爲準論邊計便在和戎次乃用兵將官
不用新進少年矯蔡確元豐官制之弊凡事于三省者並同取
旨而各行之著爲令以李常爲戶部尙書從光言舊三司使之
任所管錢穀有散在五曹及寺監者令並歸戶部罷陝西河東
軍興添置官局及熙河蘭會經制財用司禁邊人與夏爲市貶

李憲奉祠變鹽法落蹇周輔職黜開河范子淵知峽州放鄧綰
李定滁州置訴理所許熙寧以來得罪者自陳詔侍從御史舉
明經可任學官者爲司業博士主試太學如春秋補試法復春
秋博士三月辛亥章惇罷以范純仁同知樞密院事程頤爲崇
政殿說書上疏請輔養君德命同修國子學制罷謁禁及安石
經義字說自今毋得以老莊列子命題遇科舉令升朝官各舉
經明行修之士俟登第日用以升甲夏四月己丑韓絳罷轉公
著右僕射兼中書侍郎時正人彙進司馬光請起文彥博平章
軍國重事班宰相上從之五月丁巳朔遷韓維門下侍郎贈呂
誨官六月庚辰以呂惠卿惡首罪魁竄之庚戌太白晝見秋七
月辛酉光奏設十科舉士法行義純固可爲師表節操方正可
備獻納智勇過人可備將帥公正聽明可備監司經術精通可

備講讀學問該博可備顧問文章典麗可備著述善聽獄訟盡
公得實善治財賦公私俱便練習法令能斷請讞皆兼有官無
官并文武知州以上經術舉人並聽侍從近臣舉薦中書籍記
按試八月光入對延和殿辛卯罷青苗錢取回常平昏勾官令
依舊法分歲熟上中下三等穀賤則糴貴則減價以糶惟中等
則否壬子日飭有五色雲磁州穀異壟同穗九月辛酉大享明
堂以神考配赦天下作宣光殿於景靈宮奉安皇考神御己卯
張璪罷遷呂大防中書侍郎劉摯尙書右丞改封孔子後爲奉
聖公不預他職十二月戊戌華州鄭縣小數谷山崩冬溫無雪
是歲知誠州周仕隆撫納溪洞民一千三百餘戶賜錢帛京畿
旱河北楚海諸州水詔蠲其租夏人來貢又賀卽位 二年春
正月太皇太后臨朝辛巳詔蘇轍劉攽編次神宗御製二月代

州地震河北災遣左司諫朱光庭振之三月大雨雪詔天下止
營繕散遣兵匠夏四月己丑詔太師文彥博十日一議事都堂
辛卯旱皇太后權停冊禮與上避殿減膳責躬思過以圖消復
令御史分察四方牒訴冤抑不得直者癸卯雨丁未復賢良方
正等科壬寅有星如瓜出文昌秋七月辛亥詔戶部修會計錄
罷諸州數外歲貢戊午坤成節宴遣使臣齋德崇等於垂拱殿
始用樂辛未韓維罷八月辛巳西蕃阿里骨誘鬼章青宜結據
洮州以叛其首領心牟欽瓊溫溪心與岷州行營將种誼執以
獻復洮州論功遷欽瓊銀州溪心瓜州皆團練使賜銀絹有差
九月乙卯太皇太后受冊寶於崇政殿丙辰皇太后皇太妃受
冊寶於文德殿冬十月辛未日有五色雲戊子恭謝景靈宮十
一月丙辰復置漣水軍庚申受俘崇政殿赦鬼章死聽招其子

及部屬歸以自贖乙亥大雪罷宴瘞民凍死及賜諸軍貧民錢
十二月丙戌興龍節上壽於紫宸殿壬辰兀征聲延部族老幼
萬人渡河南遣使廩食之仍諭以勿失河北地是歲白虹貫日
者二夏國政亂主幼強臣乙逋等擅權逆命圍南川砦又寇鎮
戎軍三川諸砦詔令諸路帥臣嚴兵備之三年春正月太皇
太后臨朝復置廣惠倉庚戌以雪罷上元遊幸及春宴河北苦
寒命存恤流民發京西穀五十餘萬石損直以糶辛酉詔廣南
西路朱崖軍開示恩信許生黎悔過自新壬申阿里骨奉表詣
闕謝罪令邊將無出兵仍罷招納三月己巳賜進士李常寧以
下及第出身有差夏四月呂公著懇乞辭位特異恩數閒日一
朝因至都堂轉呂大防左僕射兼門下侍郎范純仁右僕射兼
中書侍郎孫固門下侍郎劉摯中書侍郎王存胡宗愈左右丞

趙瞻簽書樞密院事時元祐之治比隆嘉祐諸臣戮力輔相后盡心委之無何黨議復興宗愈進君子無黨論右諫議王覲惡之疏論不可執政后怒純仁與彥博公著辯於簾前謂朝臣本無黨但善惡邪正各以類分先臣仲淹與韓琦富弼各舉所知當時亦指爲黨此事不遠願以爲鑒觀乃徙外宗愈居位如故六月甲辰五色雲見秋七月戊辰夜東北方明如晝俄成赤氣中有白氣經天癸酉忠州言臨江塗井鎮雨黑黍十一月甲辰遣吏部侍郎范百祿等行河閩十二月癸卯朔頒元祐勅令式甲辰范鎮定鑄律度量鐘磬等以進令禮部太常參定庚申置六曹尚書樞官是歲白虹貫日太白晝見各二戶部上天下民數主客戶一千七百二十九萬零丁三千二百一十五萬零

四年春正月太皇太后臨朝罷回河役二月庚戌白虹貫日三

月丁亥不雨罷春宴宰相以旱求解不允辛卯晝有流星出東方夏四月尚書省請復詩賦與經義兼行解經通用先儒傳注舊明法科最爲下今中者卽除司法叙名反在及第之上詔罷之凡應詩賦習一經應經義習兩經皆兼語孟義及論策凡四場兩科通定高下取解額中分之名次則以策論參酌五月丁亥貶蔡確英州別駕安置浙州秋八月壬寅立縣令知州郡守考績法課以四善三最吏部歲上其狀九月辛巳大饗明堂赦天下百官加恩高年九十以上有賚乙未檢舉先朝文武七條戒諭百官遵守冬無雪十月戊申蘇轍上神宗御集命藏寶文閣癸丑御邇英殿聽講三朝寶訓十一月乙酉有星赤黃色尾跡燭地十二月癸丑更定朝儀二舞曰威加四海化成天下五年春正月太皇太后臨朝二月辛丑旱避殿減膳罷修黃河

并浚京城濠夫及提舉修河司癸卯禱雨歉瀆夏四月癸丑詔
講讀官御經筵退留二員奏對邇英閣五月乙亥始雨己卯御
殿復膳自光卒後安石之徒多爲飛語以搖動在位大防純仁
畏之始欲參用其黨以平舊怨謂之調停秋八月召鄧潤甫爲
翰林學士承旨中丞梁燾諫議劉安世朱光庭交章論之不報
因力請外從之后疑調停之說未決蘇轍上疏極言嘉其中理
卽用爲御史中丞十二月丙辰大閱禁軍賜銀牒匹帛罷轉資
是歲東北旱浙西水災賜宗室子授官者四十四人

六年春正月太皇太后臨朝三月癸亥呂大防上神宗實錄壬
午賜進士馬涓等及第出身夏四月乙未復置開寶通禮科壬
寅太白晝見五月己未朔日食六月丙申詔恤刑辛丑詔大臣
堂除差遣非行能卓異者不可輕授仍搜訪遺材以備擢任秋

七月己卯賑兩浙水災八月己亥改宗正屬籍曰宗蕃慶系錄
己酉詔修神宗寶訓閏月甲子太白晝見九月癸巳策賢良方
正能直言極諫王普司馬熈遷官有差甲辰幸新成上清儲祥
宮減天下罪一等冬十月丁卯有流星晝出東北庚午幸國子
監釋奠一獻再拜聽講無逸終篇賜祭酒豐稷三品服學官賜
帛有差庚辰令諸官院讀小學十一月壬辰行元祐觀天曆是
歲夏人寇熙河蘭岷鄜延路懷遠砦麟府州都監李儀等違旨
出戰敗死范純仁禦敵失策與餘官皆降等詔陝西河東諸路
嚴飭邊備以溪洞人田思利爲銀青光祿大夫充溪洞巡檢使
七年春正月太皇太后臨朝夏四月己未詔翰林臺諫給舍與
三省禮官議冊后六禮儀制命呂大防等攝行之五月戊戌帝
后御文德殿宣制冊立皇后孟氏庚子罷侍從官轉對六月甲

子置廣文館解額以待四方遊士之試京師者戊辰新置渾天儀成甲戌日旁有五色雲見秋七月癸巳詔修神宗史復翰林侍講學士以范祖禹爲之九月戊戌詔南郊依故事設皇地祗別議方澤之儀以聞十一月辛巳太白晝見癸巳冬至郊合祀天地大赦加恩賜徐王劔履上殿罷飲福宴庚午祈雪是歲兗州仙源縣生瑞穀永興鎮戎軍蘭環二州地震夏人寇環州詔西邊諸將嚴備毋輕出兵前陷交趾將吏蘇佐等十七人自拔來歸八年春正月太皇太后臨朝范祖禹上仁皇訓典丁亥召還英閣名宰臣讀寶訓三月庚子詔御試舉人復試賦詩論三題夏四月戊午二府議夏人自得四砦累遣使願以蘭州易塞門砦詔數其違順不許梁燾以議不合辭疾許之五月癸未置蘄州羅田縣己丑錄囚六月壬戌中書省上元祐在京通用

條貫秋七月丙子朔范純仁復相辛酉太皇太后有疾九月戊寅崩詔以吕大防爲山陵使修奉一從儉約諸道毋妄有進助遣使告哀於遼遣使弔祭如故事冬十月丙子帝御垂拱殿始親政事復內侍劉瑗等六人入內給事范祖禹蘇軾上疏力諫蘇轍劉奉世皆謂不可吕希純封還詞頭皆不聽十一月以楊畏爲禮部侍郎疏言神宗立法更制以垂萬世乞早賜講求用成繼述之道上卽時召對詢問先朝故臣孰可名用者因列上章惇吕惠卿安燾鄧温伯李清臣等上皆納焉十二月中旨除惇資政殿學士復惠卿中大夫王中正遙郡團練使給舍吳安詩不書錄黃姚勔不草詞皆不聽己巳上太皇太后諡曰宣仁聖烈是歲久雨河决內黃口遣使按視京東西河南北淮南水灾出錢粟十萬賑之京城雪寒復賑民飢令陝西沿邊專行鐵

錢

冊曰拯溺救焚滔天難止社飯未終紛更蜂起傷哉元祐
不終盛美女中堯舜一人而已

紹聖元年春二月乙未中旨以李清臣爲中書侍郎鄧潤甫爲
尚書右丞己酉祔葬永厚陵己未祔主太廟減兩京河陽鄭州
囚罪一等蠲山陵役者賦罷避高遵惠諱三月壬申朔日食乙
亥御史來之邵疏罷呂大防丁酉賜進士畢漸以下及第出身
夏四月以曾布爲翰林學士張商英爲右正言癸丑布請改元
以順天意明紹述從之甲寅白虹貫日范純仁力求罷許之壬
戌相章惇以王安石配享神宗廟庭追復蔡確原官戊辰重修
神宗實錄蔡卞曾布請惇提舉載以安石日錄丁亥遷神宗隨
龍人趙世長等秩賜賚有差五月甲辰罷制科對策立宏詞科

試詔誥章表癸丑從張商英言編類元祐羣臣章疏及更改事
條秋七月丁巳布告天下奪司馬光呂公著贈諡王巖叟贈官
貶呂大防劉摯蘇轍梁燾彭汝礪等八月開洛口新河丙戌日
有五色雲壬辰應制科趙天啓以屢上書廢黜之九月甲寅治
知廣州唐義問棄渠陽砦罪責授舒州團練副使庚申太白晝
見戊辰流星出紫微垣冬十月除呂惠卿知大名府冬溫無雪
十二月神宗實錄成安置范祖禹趙彥若黃廷堅呂大防等凡
元祐所行開寶通禮十科取士廣文解額進士詩賦與河東大
錢制置解鹽廣惠倉新經字說禁皆罷之從先帝故事復新城
兩廂并免役免行義倉以陸師閔等二十二人提舉常平等事
仍八路差官依舊成都稅茶申嚴銅錢出外界法是歲京師旱
疫命恤刑洛水漳河決溢浸洛磁等州令計置湮塞太原地震

京東河北水發粟以賑貸流民麥種使還業蠲其租稅二年
春正月甲辰詔國史院增補先帝御集已未遷奉太平興國寺
三朝御容於天章閣三月已未試宏詞黃符等五人各循一資
夏四月惇布謀復開邊罷熙河等路分畫地界戊辰罷職事官
帶珪朝請大夫以下勿分左右易集賢院學士爲集賢殿修撰
直院爲直秘閣校理爲秘閣校理秋九月景靈宮置徽音殿以
奉宣仁聖烈皇后神御復置顯承殿以奉神宗神御各詣宮行
奉安禮辛亥大饗明堂赦天下冬十一月乙未貶故相范純仁
丙申太白晝見甲寅除內侍梁惟簡名安置全州十二月壬申
白虹貫日復保申法置律學博士增添大理寺治獄官屬詔察
官免言事舉臺諫毋限資命蔡卞詳定學制是歲蘇州河南地
震河北飢出內庫財帛助賑桂陽監慶雲見殿前奏獄空賜緡

錢出宮女九十一人 三年春正月甲辰朝享景靈宮遍詣諸殿如元豐禮乙卯詔戶部尚書勿領右曹戊午罷合祀天地間因大禮之歲夏至日躬祭地祇於北郊立齋宮於瑞聖園二月癸亥出元豐庫緡錢四百萬於陝西河東糴邊儲辛未復元豐恤孤幼令癸酉罷富弼配饗丙戌詔三歲一取旨遣郎官御史按察監司職事三月禁中屢火不御垂拱殿罷春宴及遊幸丁酉尚書省火夏四月辛酉罷宣徽使丙子詔自今景靈宮四孟朝獻分爲二日五月壬子太白晝見秋七月庚戌依元豐職事官以行守試三等定祿秩罷元祐所增聚義錢八月己卯復置檢法官章惇附劉婕妤與內侍郝隨構成巫蠱獄九月乙卯廢皇后孟氏冬十月辛未西南方雷聲雨雹十二月癸酉置施州鑄錢廣積監是歲劔南東川滁沂二州地震夏人寇義合塞門

寧順諸砦又寇鄜延陷金明砦經畧呂惠卿爲十一軍自行主將事因見有備故去封濮王子未王者三人授宗室子未官者四十六人 四年春正月班內外學制罷春秋科復元豐榷茶法立市易務庚戌田嗣宗坐指斥抵罪李清臣以親黨罷帝心切惡元祐宰執二月己未命追貶公著光巖叟瞻堯俞維固百祿宗愈安置大防摯轍燾純仁於嶺南貶劉奉世王汾以下三十人降彥博太子少保閏月坐張天說上書詆訕先朝處死甲辰復徙軾昌化軍祖禹安世高賓二州三月癸亥賜進士何昌言六百九人壬午命蹇序辰編類光等事狀及臣僚章疏人爲一帙凡四十三帙來上縉紳由是無得脫禍者夏四月復追貶光朱崖公著昌化珪萬安皆司戶叅軍維崇信節副奉世柳州安置顓涪州編管己酉復文德殿侍從轉對五月辛酉以皇太

妃服藥及亢旱赦四京罪囚六月癸未朔日食丁亥太白犯太微垣連晝見己酉太原地震秋七月火入輿鬼太史奏賊在君側八月己酉彗出西方帝避殿減膳罷秋宴詔公卿悉心修政以輔不逮求直言大赦天下出元豐庫緡錢四百萬付陝西廣羅詔歸正人未給田者舍以官屋癸酉謂中太一官爲民祈福己卯封婉儀劉氏爲賢妃是歲兩浙旱饑移粟賑貸出宮女二十四人閤門使折克行破夏人於長波川知保安軍李沂破洪州郝延將王愍復宥州大拓邊地築胡山新砦賜名平羌築青石峽賜名西平又築熙河金城關築威戎平夏城置克戎靈平安疆三砦以西邊板築有勞曲赦陝西河東路增置蕃落馬軍十指揮賜防拓蕃官錢帛有差播州龔楊光榮等內附戶部上民數比元祐三年加三分之一

元符元年春正月丙寅咸陽民段義得玉印一紐其文曰受命於天既受永昌詔學士蔡京等辨驗定議以閏甲戌幸北郊齋宮二月丙戌白虹貫日三月同文館獄起京與安惇同訊極意羅織遠綱宰執劉摯梁燾子孫重徙諫官范祖禹劉安世教內侍陳衍停巖叟光廷諸子不叙丁巳建五王外第賜名懿親宅加中王秘端王佖並爲司空進封俱莘王似簡王偲永寧郡王夏四月丙申建顯謨閣藏神宗御集置學士待制等官庚子幸睿成宮壬寅學士院上寶璽名曰天授傳國受命寶并靈光翔鶴樂章五月戊申朔御大慶殿受璽行朝會禮班德音於天下減罪囚癸丑恭謝景靈宮戊午宴紫宸殿擢獻寶人段義右班殿直賜絹二百疋六月戊寅朔改元秋七月壬申京師地震九月丁未霖雨罷秋宴置看詳訴理所命蹇序辰安惇主之惇言

元祐間置訴理所得罪者獲除雪歸怨先帝收恩私室乞取公
案看詳復依元斷施行於是復竄鄭俠除秦觀各編管雷州重
得罪者八百三十家十一月甲子郊赦天下是歲澶州河溢振
恤河北京東被水者真定府忻州野蠶成蘭知蘭州王舜臣討
夏人於塞外築興平城未脂砦熙河通會開遣官分詣鄜延涇
原河東熙河按驗所築城砦復熙河蘭會路夏人寇平夏城章
綏大敗之自是兵不復振高麗賂征西南蕃入貢西蕃首領李
訛囉巴訕支呂承信等內附二年春二月詔許高麗國遣士
賓貢夏人告國母梁氏哀却其使不納三月遼遣簽樞蕭德崇
來爲夏人請緩師命中書舍人郭知章報聘之夏四月旱禱雨
釋繫囚五月甲辰太白晝見章惇等進新修勅令式帝不欲參
以元祐惇曰取其善者八月甲戌太原地震帝尙未有嗣戊寅

賢妃劉氏生子帝大喜命立爲后賜名茂九月丙寅御文德殿
行冊禮甲午熒惑犯太微垣左執法己未皇子薨追封越王諡
冲獻冬十月壬子詔河北大名二十二州軍置馬步軍指揮以
廣威保捷爲名甲寅日食既十一月乙未選監司提舉諸州學
事依太學三舍法考選生徒升補是歲鄜延鈐轄劉安敗夏人
於神堆知府州折克行獲夏國鈐轄令王皆保知環州种朴獲
監軍訛勃囉築環慶路定邊城鄜延路金湯城河東路暖泉烏
龍砦威羌城建西安州及天都等砦賜蘭會州新砦名會川城
環慶路之字平曰清平開定邊白豹城訖工閣門使張存等轉
官賜金帛有差王瞻克邈川首領陪征自青唐來降詔以胡宗
回爲熙河經畧使城會州建葭蘆戍爲晉寧軍青唐復叛王瞻
重討平之首領隴拶以城降詔以青唐爲鄯州命瞻知軍事邈

川爲涇州王厚知軍事宗哥爲龍支城俱蒞隴右羌尋叛贖棄
州而還廢廓州爲寧砦城改綏德城爲軍十二月及夏平以其
謝罪納欵恩禮歲賜一如舊例 三年春正月辛未帝有疾不
視朝已卯崩於福寧殿在位十五年壽二十五尊諡曰欽文睿
武昭孝皇帝廟號哲宗崇寧三年加諡憲天繼道顯德定功欽
文睿武齊聖昭孝皇帝 帝本與先帝一氣其貪功喜事由來
有素長奸助惡亦所固然太后勤勞九年祗如水中之月林中
之葛而驕陽之性邪曲之蔓不能剷除凡以天不祚宋致仁祖
無後而英宗繼之及帝又無後而徽宗繼之豈其君子之澤無
幾而小人之澤未斬耶以爲惇卞誤之者非惇卞能誤帝乃帝
之自誤爾

冊曰享齡不永蓄德未滋匪以持顛翻爲病支太宗一脉

無乃頽兮

天王 宋一之八上

徽宗皇帝諱佖神宗第十一子母貴儀陳氏以元豐五年十月丁巳生於大內明年正月賜名十月授鎮寧軍節度使封寧國公哲宗進遂寧郡王加平江鎮江二節出就傅加封端王又進司空移昭德彰信兩軍哲宗崩向太后簾前哭語宰臣國家不幸大行皇帝無子天下事須早定章惇初意在帝同母弟簡王既又屬中王雖長有目疾次則端王惇以爲輕佻恐不可以君天下太后曰先帝嘗言端王有福壽且仁孝不同諸王惇聞爲之默然會布言惇未嘗與臣等商議如皇太后聖諭極當察下許將相繼和曰合依聖旨乃召王入假以遺制本日於楸前卽皇帝位皇太后權同處分軍國事大赦天下除常所不原百官

進秩一等大賚諸軍加朱太妃聖瑞尊號改劉后爲元符皇后
聖母爲皇太妃命章惇爲山陵使出先帝遺留物賜近臣進封
必陳王位太傅贊拜不名僕衛王守太保似蔡王德定王並守
司徒封世雄安定郡王由寧遠軍留後爲崇信軍節度使二月
丁未立順國夫人王氏爲皇后推恩外戚向宗回宗良並遷節
度使弟姪未任者俱授以官癸未初御紫宸殿聽政進章惇特
進封申國公韓忠彥門下侍郎黃履尚書右丞叙復黨人范純
仁以下劉奉世呂希純王觀吳安詩韓川唐義問並分司鄧光
唐和禮隨安州呂希哲希績呂陶鄭佑並宮觀蘇軾蘇轍劉安
世泰觀程頤移廉衡英峽等州王古楊畏王欽臣范純禮純粹
晁補之和澗襄克毫信等州張耒河中府劉唐老武勝軍鄒浩
黃隱黃廷堅賈易王回並與監當差遣鄭俠任便居住辛酉名

潛邸懿親宅曰龍德宮升端州爲興慶軍甲子毀承慶殿罷增
八廂遷卒三月辛未封諸王公子光濟等三十三人爲王女四
十八人爲公主夏四月丁酉朔日食求直言以崔鷟爲相州教
授韓忠彥薦龔夬爲殿中侍御史陳瓘鄒浩爲左右正言瓘首
上書論國是以爲因時隨事擇其可否權其輕重而必原於天
理之正合於人心之公正不必立爲一定之名惟合天下萬世
咸以爲是而不非之者真國事也甲辰命取類臣僚章疏入
內焚之丁未立帝生日爲天寧節乙卯請諡於南郊乙丑賜進
士李釜等五百一十八人及第出身五月丙子復廢后孟氏爲
元祐皇后遷居禁中斥郝隨劉友端乙酉臺諫交論蔡卞姦惡
罪浮於惇出知江寧復請明正典刑改秘書少監分司池州上
從忠彥言元祐臣僚生者蒙恩宜旣死者詔復文彥博王珪司

馬光呂公著呂大防劉摯韓維梁燾孫固傅堯俞趙瞻鄭雍王
巖叟范祖禹趙彥若錢總顧臨趙君錫李之純呂大忠鮮于侁
孔文仲武仲姚勔盛陶趙高孫覺杜純朱光庭李周張茂則高
士英孫升凡生前官爵致仕遺表恩澤皆追還之獨燾摯此舊
猶降一官特許歸葬錄其子孫陳璠又諭同文館獄幾陷大臣
減族明正其罪貶邢恕均州安惇蹇序辰除名放歸秋七月丙
寅朔奉皇太后旨以長君罷同聽政戊辰告天地宗廟社稷上
諭冊於福寧殿庚午從姚雄奏棄遼郡貶胡宗回知蘄州王曠
王厚安置嶺南出內庫金帛糴陝西軍儲收坊場錢輸內庫罷
管勾陝西京川路坑冶及江西廣東湖北夔梓成都路管勾措
置茶鹽公事官平準司罷市易務禁曲學偏見妄意改作以害
國事者八月庚子作景靈西宮觀成殿奉安哲宗神御壬寅葬

姦黨冬十月甲戌蔡京主使復廢元祐皇后孟氏追貶李清臣黃履竄會肇以下十七人於遠州十二月癸丑論棄遼州罪貶韓忠彥安燾會布范純禮庚申鑄當五錢又罷春秋博士復紹聖役法置安濟坊居養院以養鰥寡貧民作辟雍於城南諸生自縣庠升之州學分三舍貢之辟雍自辟雍登太學俟殿試命以官置兩京宗正司及敦宗院京畿京東河北淮南蝗江浙熙河漳泉潭衡郴州興化軍旱辰沅州徂入寇出宮女七十六人二年春正月蔡京專政竄任伯雨等九人甲午辰沅州蠻納土改誠州爲靖州徽州爲蒔竹縣遣官相度湖南北徭地取其材植入供在京營造二月辛酉置殿中監尚食尚藥尚醞尚米尚葦凡六局命諸州歲貢六尚物復用郝隨爲修內司工役大作丙子更榷茶鹽鈔法置諸路茶鹽場復市易抵當庫三月癸卯

賜進士霍端友以下五百三十八人及第出身其嘗上書在正
等者升甲邪等者黜之夏四月乙亥毀元祐黨人文字唐鑑蘇
黃等集并程頤所著書今有司覺察帝初謁景靈宮命毀呂公
著以下八人繪像五月詔童貫監洮西軍六月復湟州降德音
於熙河蘭會路置湟州茶馬司秋七月壬午白虹貫日九月邪
洵武言元豐官制止正省臺寺監之職乃詔以承直郎易留守
節判察官以儒林郎易書記支使防團判官以文林郎易留守
節察推官軍監判官以從事郎易防團推官監判官以從政郎
易縣令錄事叅軍以修職郎易知錄事知縣令以迪功郎易軍
巡判官司理司法司戶主簿尉凡七階 三年春正月募京專
政命方士魏漢津定樂鑄九鼎并常十大錢令天下坑冶金銀
盡輸內庫癸卯太白晝見二月詔自今御內殿許起居郎舍人

侍立辛未雨雹三月辛巳置文繡院丁亥令諸州築園土甲午
躋欽成皇后神主於欽慈后上辛巳大內災詔守臣進金帛助
修營乙卯復都廓建鄴州爲隴右都護府加蔡京許將趙挺之
吳居厚安惇蔡卞等官乙丑罷講議司五月戊寅改開封爲牧
尹少尹定六曹官以吏戶儀兵刑工爲序甲申復罷鄴州都護
爲西寧州隴右節度六月壬寅朔閏熙寧元豐功臣於顯謨閣
以安石配饗孔子廟丙午增立諸州縣學并弟子員州路官通
判等增入主管學事四字別置齋舍以養材武之士立武學試
藝法壬子置書畫筭學戊午詔重定元祐元符黨人及上書邪
等者合爲一籍通三百九人刻石文德殿門七月辛卯復行方
田置京西北路交子所八月甲辰蔡京上神宗史冬十一月甲
戌幸太學并辟雍賜司業吳綱蔣靜四品服學官推恩有差丙

申郊赦天下升興仁軍爲隆德府通遠軍爲鞏州連歲諸路蝗
四年春正月蔡京專政與下有隙免官二月從中書省請擇勳
戚近臣子孫以爲親衛勳衛翊衛郎中郎等官俄改爲三衛侍
郎甲子雨雹閏月復元豐銓試斷按法罷轉運使檢察鈞考法
以左右司所編紹聖元符以來申明斷例班天下刑名例班刑
部大理寺令州縣做尚書六曹分六案甲申置陝西河東河北
京西監鑄當二夾錫鐵錢秋七月從蔡京奏汴都無險始建漣
鄭曹拱四州爲四輔郡各置總管屯兵二萬九月帝以大晟樂
成受賀於大慶殿赦天下除黨人父子兄弟之禁還流人貶謫
者以次徙近地惟不得至畿輔自七月雨至於冬十月不止蘇
湖秀三州大水賜乏食者粟壬辰日中有黑子十一月以朱勔
領花石綱是歲築溪哥御謀二城改熙河蘭會爲熙河蘭湟路

擢童貫經畧安撫制置使置蕃學及諸路招納蠻夷司功與斬級同賞及置庭孚二州秦鳳招納司言階州生蕃內附獻邦潘疊三州祥柯夜郎首領亦以地降夏人攻塞門臨宗順寧等砦鄜延副將劉延慶擊之復攻湟州北蕃市城知州辛叔獻等却之遣蕭良來爲夏人求還侵地及退兵遣林越報聘以失賊情貶知潁州復遣劉正夫使遼五年春正月戊戌彗出西方其長竟天帝避殿減膳求直言大赦天下丁未太白晝見帝悟蔡京姦邪誤國除黨人一切禁例崇寧以來左降者各以存歿稍復其官盡還諸徙者罷方田及諸州歲貢六尚供奉物罷沿邊諸路科歛罷鑄當十錢省非衝要處新置市易務罷諸路提舉香鹽礬茶學事停買木水利等司并提舉保甲官書畫算醫四學以至三衛官及園土二月方旱京罷卽雨上大喜三月丙

申禁減詔星變已消直言無用罷者一切如故上聞中外有三不可之說謂法度不可變劉達不可用蔡京不可去乃復謀相京而罷劉達右正言詹不遠以爲其中必有媒孽之者上默然不聽癸卯御集英殿策進士蔡凝以阿附得首選頒所對於天下凡賜禮部奏各進士及第出身六百七十一人夏四月許夏人平悉與崇寧以來侵地五月丁未頒劉昺所造紀元曆秋七月庚辰朔日當食不虧羣臣稱賀得鎮國寶六寸龜紐文曰承天福延萬億永無極壬寅詔改明年元

弘簡錄卷九十一

明刑部員外郎仁和弘齋邵經邦學

皇清翰林院侍講學士四世孫遠平校閱

天王 宋一之八下

徽宗大觀元年春正月戊子朔救天下甲午蔡京復相帝以開
寶通禮及景祐元豐以來所修多有未備庚子置議禮局於尚
書省命詳議官具禮本末議定請旨以給事中劉昂領其事辛
丑甘露降於帝鼎羣臣稱賀二月蔡攸爲龍圖閣學士兼侍讀
日以花石禽鳥獻帝欲使帝不聞天下治亂帝寵信之三月甲
辰立孝友睦姻任恤忠和八行取士科應舉者免解試補太學
上舍夏五月甲午頒大晟樂於天下癸卯詔自今凡總一路及
監司之任勿以元祐學術及異意人充選秋七月詔括天下漏

丁守令以戶口爲殿最九月建顯烈觀於陳橋加上僖祖諡曰
立道肇基積德起功懿文憲武睿和至孝皇帝景靈宮建神御
殿辛亥大饗明堂赦天下升永興太原鄆州並爲大都督府建
鎮州爲靖海軍瀛州爲河間府瀛海軍江寧荆南揚杭越洪福
潭廣桂並立帥府編管上書李景直曾縱黃宰方軫四人於嶺
南冬十月蘇州地震十一月壬子朔日食是歲秦鳳旱京師大
水河決伊洛溢遣官賑濟貸被水戶租廬州兩豆汀懷二州慶
雲見乾寧軍黃河清升爲清州涪州襄駱世華駱文貴內附安
化蠻犯邊益兵赴廣西討之 二年春正月壬子朔大雨雪都
城平地八尺飛鳥盡死帝受八寶於大慶殿赦天下文武進階
一等蔡京表賀諸般符瑞進太師加童貫武康軍節度使仍宣
撫內臣建節始此是月河東北盜起二月甲申置諸路曹掾官甲午建

徵猷開藏哲宗御集置學士直學士待制官三月庚申頒金籙
靈寶道場儀範於天下遣內侍譚稹使舒江池揚等州夏五月
庚戌朔日食童貫遣統制官辛叔獻領兵復洮州又克溪哥城
王子臧征撲哥降以爲積石軍奏至百官稱賀賜京玉帶加貫
司空六月瀘南奪任應舉納土建爲珍州淪州蠻趙泰等內附
建爲漆州九月癸酉王皇后崩冬十一月丁未朔太白晝見同
州黃河清湖南谿楊再光內附幅員二萬九千餘里輔臣表賀
三年春正月丁卯以涪夸地爲永州甲戌升涇州爲饗德軍融
州爲清遠軍二月丙子朔播州楊文貴納土卽其地置遵義軍
三月乙丑賜進士賈安宅等六百八十五人及第出身夏四月
右正言陳禾劾奏童貫黃經臣與中丞盧航表裏爲姦謫監信
州酒五月乙巳朔學官孟翊獻所畫卦象謂宋將中微宜更年

號改官名變庶事以厭之帝不樂詔竄遠方丙辰宴辟雍用雅樂戊辰大雨雹六月丁丑蔡京罷加何執中特進左僕射兼門下侍郎太學生陳朝老上書陛下卽位以來凡五命相若忠彥庸懦曾布汙濫挺之蝥恐蔡京盛國害民今復相執中是猶以蚊負山多見其不勝任也不報庚寅冀州河水溢秋七月丁未詔謫籍人除元祐姦黨及得罪宗廟外餘並錄用自六月不雨至於冬十月江淮荆揚閩浙大旱秦鳳階成飢發粟以賑獨其賦十一月詔立黃帝爲算學先師以風后等八人配饗巫咸等七十人從祀是歲併黔南入廣西路瀘州夸王募弱內附建爲純滋二州 四年春正月詔專奉道教停僧牒士庶不許拜僧禁然頂煉臂刺血斷指帝見張商英與蔡京能立異同更稱爲賢名對有入相之意三月併醫算書畫四學生入太醫太史書

藝出圖四局罷其學官癸亥詔甄錄罪廢并上書邪等人以貴
來劾夏五月癸未京上哲宗實錄丁酉詔修哲宗史五月丁未
有星孛於中宮長數丈始出王良造父間歷閣道逆行入紫微
垣掃內外坐已退又進掃帝坐前後二十餘日乃滅星之變異
莫甚於此諫官石公弼張克公毛注等極論蔡京罪惡并王祖
道張莊拓地欺誕罪京與祖道皆坐貶甲寅帝以宏詞科不足
以致文學之士改立詞學兼茂科歲附貢院試去檄書增制詔
六月詔諸路有不便民事監司條奏之復罷方田并鑄當十夾
錫鐵錢省內外冗官九月丙寅朔日食冬十月丁酉立貴妃鄭
氏爲皇后戊戌太白晝見十一月丁卯郊大赦改元復罷拱州
爲襄邑縣張商英請編皇宋政典黜蔡京之妄

政和元年春正月毀京師淫祠千三十八區廢所置白龔平從

等州廢鎮州升瓊州爲靖海軍二月詔陝西河東復鑄夾錫錢
改當十爲當三夏五月己卯東南有星晝隕丁亥解池生紅鹽
六月甲寅復蔡京太子少師俄進太子太師九月童貫起彘滅
遼帝遣與鄭允中同使以覘之有燕人馬植因得罪請見陳破
燕之策貫悅之携歸薦於上命爲秘書丞賜姓名趙良嗣圖燕
之議始此二年春正月戊子朔復蔡京太師賜第京師入朝
宴於太清樓三日一至都堂議政事三月親策進士賜莫儔等
七百十三人及第出身夏四月辛卯日中有黑子復行方田禁
史學六月乙卯白虹貫日秋九月蔡京大改元豐制度更定官
名罷文臣勲官正三公三孤改侍中爲左輔中書令爲右弼左
右僕射爲太宰少宰罷尚書令而以太尉冠武階首以童貫爲
之譚稹經營河東至晉州得異物於民間歸以進京譏爲天所

錫禹元圭帝命行朝會禮十一月戊寅日南至受圭於大慶殿
赦天下進封京魯國公以何執中爲少傅鄭居中爲特進執政
皆遷秩是歲遼主淫酗不恤國政阿骨打朝於混同江疑其異
志其弟吳乞買粘罕有武畧勸兄稱兵併旁近部族率五百騎
突入咸州 三年春正月癸酉追封安石子雱臨川伯配饗文
宣王廟二月辛卯女真與遼相持阿骨打自稱都勃極烈詔河
北沿邊防餉備禦三月壬子朔日食夏四月作玉清和陽宮卽
福寧殿誕聖之地奉安道像上詣宮行禮時道教極盛自徐知
常始賜號冲虛先生徐守信號虛靜先生劉混康號冲和先生
後並贈大中大夫至是復信神仙之事又作保和殿賜方士王
志老號洞微先生王仔昔號通妙先生癸巳命頒五禮新儀於
天下議禮者又言開元禮不足法置局討論古今宮室車服冠

冕之制冠婚喪祭之則閏月改公主爲帝姬五月丁未詔尚書
內省分六司以掌外省六曹所上之事置內宰副宰內史治中
等官及都事以下吏員冬十月乙丑新宴樂成閱於崇政殿出
古器以示百官十一月辛巳朝獻景靈宮壬午饗太廟加上神
宗諡法古立憲改上哲宗諡世德揚功餘並如故癸未郊上禘
大圭執元圭以道士百人執儀從前導蔡攸爲執綬官出南薰
門至玉津園攸誣奏雲間樓臺殿閣隱起有道童持旛節相迎
衣服矚目歷歷可識帝以天神降詔告在位作天真降臨示現
記十二月癸丑詔天下訪求道教仙經辛酉太白晝見是歲升
永安縣爲永安軍趙城縣爲慶祚軍定州爲中山府蘇州爲平
江府潤州爲鎮江府端州爲興慶府築溱播等八州城畢放廢
梓路執政進官一等復置白州築祥州 四年春正月戊寅朔

置道階凡二十六等先生處士八字六字四字二字視中大夫
至將仕郎而不給俸辛丑追封漢王子宗誼以下八子皆爲王
夏四月癸丑開太學辟雍諸生雅樂五月丙戌始祭地於方澤
以太祖配降德音秋八月乙巳置延康述古二殿學士罷端明
樞密直之號冬十月生女直兵始滿萬陷遼寧江軍乘勝併勃
海遼陽等五十四州是歲改洧井監爲長寧軍戎州爲叙州以
廣西溪洞地置隆兌二州復置拱州 五年春正月完顏阿骨
打自稱皇帝更名旻國號大金己丑詔諸州醫學立貢額二月
甲寅冊立長子桓爲皇太子赦天下見責降文武臣僚並與牽
復甄叙凡千五百人以陳邦光爲太子詹事時蔡京獻大食國
琉璃酒器邦光語太子京爲大臣不聞以道德相訓乃以玩好
之具來獻蕩心喪志太子命左右碎之京怒竄之池州庚午童

貫領六路邊事三月辛未朔太白晝見癸巳賜進士出身六百
七十人夏四月甲辰作葆真宮丁未幸秘書省改集賢殿爲右
文殿癸亥置宣和殿學士以蔡攸爲之詔東宮講讀官罷讀史
秋七月戊辰朔日食流星出於柳其光照地有尾占者以爲不
祥京獨云國家建造有喜丁丑勅帝卽秘書省地建明堂以爲
明堂使九月金陷遼黃龍府遂渡混同江冬十月劉仲武王厚
等攻夏臧底河城敗績夏人大掠而還是歲改龍州爲政州升
舒州爲德慶軍汝州爲陸海軍通利軍爲濟州遂州爲遂寧府
六年春正月賜方士林靈素張虛白號置道學自元士至志士
凡十三品許歲大比襴襖就試戊子命童貫宜撫陝西河北劉
法帥師伐夏克仁多泉城种師道克臧底城二月詔修御河爲
景龍江廣京城至封丘門作上清寶籙宮起複道以通齋醮之

路大繕諸王外第夏四月庚寅詔蔡京正公相位總治三省事
五月庚子以鄭居中爲少保太宰兼門下侍郎劉正夫爲特進
少宰兼中書侍郎秋七月築震武城升爲軍山是嶠所隸之地
悉爲郡縣矣辛酉改節度觀察畱後爲承宣使走馬承受公事
爲廉訪使者增置直徽猷閣顯謨華文天章秘閣集英殿修撰
爲九等丁亥幸蔡京第九月辛卯朔詣玉清和陽宮重上昊天
玉皇上帝后土皇地祇徽號寶冊大赦天下令洞天福地修建
宮觀塑造聖像冬十月乙丑太白晝見十一月己亥郊赦天下
是歲冀州三山黃河清升潁州爲順昌府晉州爲平陽府壽州
爲壽春府齊州爲濟南府 七年春正月以童貫爲開府儀同
三司領樞密院隨龍人高俅爲太尉二月癸亥大理入貢封其
主段和譽爲本國王領雲南節度使甲子幸上清寶籙宮設千

道會命林靈素誦道經繆言玉帝憫中華被金狄之教令帝主
天下悉歸正道改天寧萬壽觀爲神霄玉清萬壽宮玉清和陽
宮爲玉清神霄宮設長生帝君青華帝君像道籙院上章冊帝
爲教主道君皇帝三月庚寅賜高麗進士權適等四人五月辛
卯命蔡攸提舉左右街道籙院六月明堂成進封蔡京陳魯二
國公辭不拜官其親屬二人壬午詔禁巫覡秋七月壬辰熙河
環慶涇原地震置提舉御前人船所以內侍鄧文誥領之九月
辛卯大饗明堂并祀五帝赦天下冬十月乙卯朔初御明堂班
朔布政十二月戊申朔有星如月南行戊辰天神降於坤寧殿
作萬歲山以戶部侍郎孟揆主之是歲升鼎州爲常德軍温州
爲應道軍慶州爲慶陽軍渭州爲平涼軍復置醴州升石泉縣
爲軍

重和元年春正月甲申朔增造受命寶其文曰範圍天地幽贊
神明保命太和萬壽無疆帝受於大慶殿先是建隆中女真嘗
自其國泛海至登州買馬故道猶存有漢人高蔡師泛海來言
其建國破遼之事登州守臣王師中以聞帝命募人資市馬詔
同蔡師以往不能達二月庚子復委童貫選人始遣武義大夫
馬政由海道通使於金願與通好共伐遼以求燕雲故地靖康
之禍實始於此三月戊戌賜進士王昂等及第出身七百八十
三人嘉王楷預焉夏四月以太上混元皇帝二月十五日生辰
爲貞元節青華帝君八月九日生辰爲元成節五月壬午朔日
食乙酉詔諸路漕臣提舉神霄宮丁亥賜林靈素視中大夫張
虛白視中奉大夫並授本品眞官壬辰頒御製聖濟經御註道
德經并莊列子於太學辟雍置博士二員領之六月己巳淮西

盜平甲戌西邊獻捷曲赦加蔡京恩官其一子以童貫爲太保
鄭居中少傅余深少保鄧洵武特進執政官皆進一等八月大
丙火自中夜達曉天大雨火益熾凡蕪五千餘間宮人焚死甚
衆帝是夜微宿於外九月辛巳大饗明堂己丑以歲當戊月當
壬爲元命降德音於天下丁酉用蔡京言集古今道教事爲紀
志賜名道史閏月丙子復立恭帝後以備三恪冬十月己卯朔
太白晝見甲辰別置道官自太虛大夫至金壇郎凡十六等同
文臣中大夫至廸功郎道職自冲和殿侍宸至凝神殿校經凡
十一等同待制修撰直閣皆給告身十一月己酉朔改元大赦
辛亥日中有黑子是歲升六安縣爲軍改兗州爲襲慶府興慶
軍爲肇慶府梓州爲潼川府江淮荆浙梓州水災遣廉訪使者

六人賑濟

宣和元年春正月乙卯詔改佛號大覺金仙寺院爲宮觀僧爲
德士並許入道觀依道士法女冠爲女道尼爲文德丁巳金遣
渤海人李善慶賫北珠生金等物來上帝遣趙有開資詔并禮
物報之至登州有開死差平海軍校呼慶送善慶歸金貴呼慶
却所資詔留半年遣歸高麗來言并丹爲中國捍邊不可攻女
真狼虎不可交宜早爲之備帝不樂上初訪大臣取遼之策鄭
居中鄧洵武皆謂不可獨王黼以身任其事或傳遼天祚有亡
國之相黼薦書學正陳堯臣使遼密繪之并圖其山川險易以
進勸帝速用兵帝大喜擢堯臣右司燕雲之議遂決左司倪濤
舉累朝信誓願無輕議知湖州葛勝仲與黼連姻勸以享天下
之安無使至危皆不納乙亥帝耕籍田皇后親蠶二月庚辰易
宣和殿爲保和殿夏四月丙子朔日食五月丙午朔京師大水

平地十五丈次夕西北有赤氣數十道亘天犯紫宮北斗六月
詔封莊周微妙元通真君列禦寇致虛觀妙真君配享混元皇
帝初夏人恃橫山諸族善戰故用以抗中國政和中進築其地
夏失所恃己亥遣使進誓表許以納款詔令六路罷兵自是一
意於遼秋七月甲寅加童貫太傅九月甲辰朔宴蔡京於保和
殿見安妃辛酉大饗明堂癸亥幸道德院觀金芝遂由景龍江
泛舟幸蔡京第淑妃皆從咸去君臣勢分用家人禮十一月乙
卯郊十二月帝數微行巾褻衣服與臣庶同離宮皆爲白屋不
施五彩苑囿效村居野店多聚獸蹄鳥跡識者預知不祥是歲
京西東南諸路水災淮東旱遣官振濟嵐州黃河清改涇州爲
樂州升邢州爲信德府陳州爲淮寧府趙州爲慶源府瀘州爲
瀘川軍睦州爲建德軍岳州爲岳陽軍寧州爲興寧軍宜州爲

慶遠軍光州爲光山軍均州爲武當軍 二年春正月林靈素

有罪斥死罷道學復寺觀并僧名二月遣趙良嗣持書使金稱

爲大金皇帝禮如敵國差童貫勒兵相應約定兩國自白溝進

夾攻遼人彼此兵不得過關歲幣依契丹舊數與之夏五月丁

巳祭地六月丁丑太白晝見戊寅蔡京致仕九月辛亥大饗明

堂冬十月戊辰朔日食加內侍梁師成太尉布衣朱夢說論其

權勢太重編管池州是月建德軍妖賊方臘反始命內侍譚稟

往討逗留不敢進十二月臘連陷建德并歙與杭州改稷爲兩

浙制置使貫江淮荆浙宣撫使以討之是歲梁山水滸盜宋江

以報不平爲名犯淮陽及京西河北入海州界知州張叔夜招

捕降之 三年春正月方臘攻陷婺及衢州罷蘇杭造作應奉

局及御前綱運木石彩色等場務并方田宗學辟雍三舍法諸

路提舉學事官二月又陷處州降詔招撫赦天下三月庚申賜
進士何渙等六百三十人及第出身梁師成下使臣鄧宏曹組
竄名其間夏四月裨將韓世忠擒臘獻於京師詔改建德軍爲
嚴州欽爲徽州五月大蝗丙午金再遣曷魯等來命國子司業
權邦彥館之傳旨諭金使令歸曰遼人已知遣人海上往還難
以復如前議邦彥驚曰如此則失其歡心曲在朝廷矣復奏候
童貫歸議之使留三月餘卒以國書付之不更遣使金旻意朝
廷絕之乃悉師趨遼中京閏月復應奉司命王禴與梁師成領
之六月河決恩州清河埽秋七月丁亥廢純滋等十二州京畿
民訛言黑膏至始於禁中二歲乃息八月乙巳童貫復領陝西
兩河宣撫加譚稹節度使丙辰方臘伏誅九月辛未大饗明堂
冬十月詔宦者李彥括京東西路民田按民券券以樂尺打量

羸者皆拘入官徵租課以爲公田農民大擾僅輸公田錢反不
充正稅十二月辛卯朔日中有黑子 四年春正月癸酉金破
遼中京天祚北走三月丙子遼人立燕王淳金旻來約夾攻改
貫河北河東宣撫蔡攸副之勒兵十五萬以應金五月貫命都
統制种師道總東路兵趨白溝辛與宗總西路兵趨范陽燕王
淳聞之遣耶律大石蕭幹來禦我師敗績六月己丑師道退保
雄州遼人追擊至城下帝聞懼甚遂詔班師秋七月淳死其妻
蕭氏立爲太后主國事黼復命貫攸治兵以劉延慶爲都統制
朝散郎宋昭上書固諫黼大惡之除名編管廣南金聞貫再舉
兵恐運取燕京歲幣不可得卽遣徒孤且烏狄等來帝遣趙良
嗣馬攬如金報云不負約九月辛酉大饗明堂己卯遼蕭后專
政涿州留守郭藥師易州守將高鳳各以州來降貫出師在道

受之以涿州兵八千易州兵五千並隸延慶軍蜂大振蕭后遣蕭容韓昉奉表稱藩攸揮之而去勒須納土乃受冬十月甲辰師次涿州藥師與高世宣楊可世等謀襲燕爲蕭幹所敗世宣死之衆軍遂潰幹追至涿水乃還契丹由是輕宋十一月庚午邠戍寅金遣李靖等來許歸山前薊景檀順涿易六州改燕京爲燕山府涿易八州並賜新名拜攸少傅判燕山府王黼欲併得營平灤三州復遣良嗣如金求之金旻以爲初約但求石晉賂契丹故地此三州非晉賂乃劉仁恭所獻如必欲得之併燕京不與十二月壬辰金遣使以所獲遼俘來獻是歲戶部獻民數比西漢盛時益有加焉隋唐疆理皆不可及萬歲山成更名艮嶽詔始收經制錢悉歸民間利於上爲東南七路之害五年春正月金人背盟言本朝用兵力攻下燕京當收稅租良嗣

爭以租稅當隨地豈有與地而不與租者乃復遣李靖來議補以爲非約不許上因交好之故許以銀絹充之靖復請去年歲弊帝亦特許之三月再命良嗣與靖至金請三州金堅意不與言欲作邊鎮復議租稅旻遣良嗣歸報燕租六百萬止取一百萬不然且提兵按邊若過半月不至吾兵至矣黼欲成功之速再遣盧益報聘悉如其言夏四月癸巳金遣楊璞以誓書及六州來歸庚子貫攸入燕表奏撫定之功下詔曲赦諸路因命班師時燕之職官富民金帛子女皆爲金掠所留者空城而已五月己未詔赦天下癸酉祭地祇是月金主旻殂弟晟立知燕山府王安中奏知平州張覺來降黼納之良嗣以爲必召金兵不聽秋八月辛巳朔日當食不見壬寅太白晝見九月辛酉大饗明堂十一月丙寅幸王黼第上自便門過架師成家黼自出傳

旨散侍從百官禁衛諸班殿直爭願見上不肯退集於教場以備不虞夜漏下五刻帝潛過龍德宮複道小墻以還內官十餘人執兵衛之三衛衛士無一人得入者明日貶諸路漕臣上供錢物不足者二十二人丁卯金遣幹離不襲平州覺奔燕山因索甚急命安中縊殺之函首送金由是藥師等降者皆解體十一月罷安中以蔡靖知燕山府事是歲金遣使來告哀告嗣位復遣使賀生辰正旦皆如敵國禮 六年春正月御樓觀燈忽有人躍出墨色布衣若僧行狀以手畫簾指斥上怒究問何人加以箠掠炮烙不言痛楚隨施刀鋸血肉狼籍竟不知誰何因大不悅而罷三月金遣使詣宣撫司索糧稌以良嗣口許不與金人大怒京師自去冬地大震官殿門皆搖動有聲河東陝西尤甚蘭州山上草木没入在地而山下麥苗反在山上帝聞之

大驚遣黃潛善往視潘等迎合帝意歸奏以爲不實夏四月癸丑賜進士沈晦等及第出身八百五人內師成納賄赴廷試者百餘五月命連南夫往金弔祭許亢宗賀卽位金方營大室以居凡數千間規模盡倣中國極其宏侈六月帝以燕山戍守費耗極大意甚不樂補初作免夫令詔京西淮浙江湖四川閩廣並納免夫錢至宗室后妃戚里宰執之家一槩數納期以兩月違者從軍法所得纔二千萬緡而結怨四海矣八月金舉兵渝盟以納張覺不與糧爲名攻應蔚等州逐守臣又陷飛狐靈丘二縣絕山後交割之意上加罪譴祺措置乖方落職致仕又欲誘致遼主天祚復起童貫名爲代稟實往迎之然卒不至九月庚寅金芝產改艮嶽名壽岳冬十一月丙子太白晝見王黼有罪致仕中宮贊上復名蔡京領三省事十二月令講議財利於

尙書省罷應奉司詔百官遵行元豐法制是歲河北山東盜起
命內侍梁方平討之都城賣青果男子孕而誕子酒保妻朱氏
生髭 七年春正月金滅遼天祚恨中國不可倚仗謀歸西夏
金自是久蓄南侵之謀矣夏四月帝勒蔡京致仕秋七月熙河
河東地震裂至數十丈義勝軍三千與易州常勝軍五百叛奔
於金具言中國虛實其臣劉彥宗余覩蕭慶力勸金主進兵朝
廷聞之復用貫爲宣撫使安危皆倚賴之九月辛巳大饗明堂
有狐升御榻坐都城東門外鬻菜夫向宣德門傳道太祖太宗
詔上之語金連遣使與兵俱至帝命吏部員外郎傅察接伴至
燕山值幹離不主東路兵入遇之非禮要拜不屈而死丙戌郊
甫離壇所報敵至幾不成禮庚寅起种師道爲兩河制置使十
二月金粘沒喝主西路之師入雲中陷朔代州遂圍太原使王

介儒持書語甚倨傲貴以渝盟納叛令貫速割河東河北以大
河爲界用存宋國宗社貫驚懼與所屬以赴關稟議爲名逃還
京師幹離不入檀薊州藥師復叛使爲嚮導盡陷燕山州縣引
兵向闕丙辰罷花石綱及內外製造局始詔內侍梁方平帥衛
士守黎陽戊午金師日迫命皇太子爲開封牧己未下詔罪已
許中外直言極諫令天下率師勤王募草澤異才有能出奇計
及使外疆者與官爵從宇文虛中言罷道官并大晟府西城諸
行幸局所管緡錢盡付有司仍令宣諭河北東路檄召熙河秦
鳳經畧姚古种師中直赴汴京應援太常少卿李綱語所善給
事中吳敏宜亟立皇太子庚申下詔內禪皇太子卽帝位尊上
爲教主道君太上皇帝皇后爲太上皇后夫以小人至於章
惇趙良嗣亦已極矣然猶知端王輕佻不可以君天下納張覺

歸平州必召金兵其亡可以立見史臣尙謂帝之失國非若晉惠之愚孫皓之暴亦非有曹馬篡奪特逞其私智小慧用心一偏以致此爾竊獨以爲中庸之道過與不及均爲一等古稱桀紂智足以拒諫言足以飾非以爲天下皆出已之下徽宗有焉又寵妹喜褒姒至爲傾官瑤臺舉火之戲其與安妃林靈素夫何異至於好利不但如芮良夫所言後世無以復加夫以徽宗一身而備極桀紂幽厲之所爲其不亡又何待哉若以爲自古人君玩物喪志縱欲敗度者則又不但帝一人而已

冊曰百孽千妖自作難活方幸人亡不知已滅金時崛起如火向雪昏德之敗垂鑒史冊

天王 宋一之九

欽宗皇帝諱桓徽宗長子母恭顯王皇后以元符三年四月日

西生於坤寧殿初名亶封韓國公建中靖國元年六月進封京

兆郡王崇寧元年二月更名烜十一月復改今名大觀二年正

月進封定王政和元年三月講學於資善堂三年正月加太保

四年二月癸酉冠於文德殿五年二月立爲皇太子丁巳謁太

廟詔乘金輅設鹵簿如至道天禧故事官僚參謁並稱臣皆辭

六年六月癸未納妃朱氏內禪之日趨入禁中被以御服泣涕

固辭因得疾又辭不許辛酉卽皇帝位御垂拱殿見羣臣日上

有五色暈復挾赤黃珥重光摩盪久之是日帝出居顯景園太

上皇出居龍德宮以李邦彥爲龍德宮使蔡攸吳敏副之王戊

大赦改元進百官秩賞諸軍立妃朱氏爲皇后以李綱爲兵部

侍郎奏禦敵固守之策請急召諸路軍馬以壯京師徐議出征

至於疆土宜以死守不可尺寸與人上嘉納遣給事中李鄴使

金告禪位請復修好金太史占帝星復明幹離不至慶源府欲
回郭藥師止之入陷信德府太學生陳東等上書數蔡京童貫
王黼梁師成李彥朱勔之罪請誅六賊

靖康元年春正月元旦受朝退詣龍德宮賀太上皇帝詔中外
臣庶直言得失金兵已渡河梁方平棄師奔還已已破相與滸
滑州庚午太上奔亳州以貫攸等自隨百官潛遁白時中等請
上南幸吳敏持不可李綱力諫而止下詔即日親征拜綱尙書
右丞充東京留守兼親征行營使副以李梈罷白時中起復李
邦彥爲太宰兼門下侍郎張邦昌爲少宰兼中書侍郎京城戒
嚴遣使督諸道兵入援綱以便宜治戰守之具數日而畢癸酉
幹離不軍抵汴城據牟駝岡是夜攻宣澤門綱往禦斬獲百餘
人至旦始退甲戌金遣吳孝民來言帝新立宜別立誓書結好

帝遣李稅使之幹離不盛稱更欲譏和存趙氏宗社須金五百萬兩銀五十萬兩牛馬萬頭表段百萬匹尊金帝爲伯父歸燕雲叛亡者割中山太原河間三鎮以宰相親王爲質送大軍過河乃退因出事日一紙付稅遣與金使蕭三保奴等同來乙亥復攻通津景陽等門李綱督戰自卯至酉斬其酋長十餘首數千級丙子稅至邦彥等力勸當從其議帝乃遣殿減膳括借都城金銀及倡優家財得金二十萬兩銀四百萬兩誓書割地遣質一依其言庚辰命張邦昌副康王構使金軍辛巳道君至鎮江壬午金遊騎復大掠城下統制官馬忠募京西兵適至迎擊於順天門外敗之丁亥种師道督湮原秦鳳兵入援請帝緩給金幣使敵情息惰扼其歸路殲之於河邦彥不從日輸之二月丁酉朔熙河將姚古與其子平仲同赴援平仲帥步騎萬人夜

斫金營金候吏覺之遣兵迎擊而敗平仲懼誅亡去金人來詰
邦彥歸過李綱罷以謝之廢親征行營司太學諸生陳東及軍
民數十萬不期而集呼聲動地言罷綱正墮金人之計遇邦彥
入朝數其罪而罵吳敏傳宣不退殿帥王宗澁恐生變奏上勉
從之遣耿南仲大呼已得旨宣李綱矣衆以內侍朱拱之宣綱
後期嚮而磔之并殺內侍數十人先是代綱者蔡懋下令禁不
得施一矢士衆憤懣及綱復爲右丞充京城防禦使號令能殺
敵者厚賞衆無不奮躍金人懼稍稍引却康王在敵營與金太
子同射連發三矢皆中疑爲將官良家子非親王乃遣歸癸卯
復命肅王樞爲質與宇文虛中賚割地詔書往金帥得詔果不
俟金幣數足遣韓光裔告辭遂退京師解嚴丙午赦天下御殿
復膳時西路帥粘沒喝亦來求賂怒時相拘其使且結耶律余

觀圖之乃分兵趨京師威勝軍李植以城降乙卯陷龍德府知府張確通判趙伯孫司錄張彥適死之進屯澤州丙辰有二流星一出張宿入濁沒一出北河入軫辛酉復以神師道爲兩河宣撫使古與師中副之使屯滑州分援三鎮粘罕犯高平知澤州高世由犒之乃去三月癸未迎還上皇乙酉太上皇后先入朝於寧德宮丙戌賞城守勞加知中山府脩度資政殿大學士知太原府張孝純知河間府陳遘並爲學士高世由直龍圖閣又進孝純檢校少保武當軍節度使副總管王稟爲建武軍節度使姚古復龍德府及威勝軍時在廷議論矛盾樞密主破敵而三省令護送出之師中欲由邢相捷出上黨擄粘罕軍朝議不許幹離不至三鎮皆固守不下師道進兵驅逼出境而還壬辰有流星出紫微垣夏四月己亥迎太上入居龍德宮朝之癸

卯立太寧王諶爲皇太子巳酉立上生日爲乾龍節羣臣及金使上壽於紫宸殿五月黜安石配享孔子時太原尙圍詔師中由井陘與古犄角進兵戰於榆次師中死之六月益急又以綱代師道副以劉幹使宣撫兩河壬子天狗星墜地有聲如雷丙辰太白熒惑歲鎮四星合於張太白有犯歲星是夕彗出紫微垣長數丈北拂帝座掃文昌帝避殿減膳令諫官極論闕失秋七月丙子召政和上書人宋昭赴都堂審議戊寅改修宣仁聖烈皇后謫史庚辰綱山河陽進次懷州遣解潛屯威勝軍韜屯遼州都統折可求張思正屯汾州范瑗率山東兵屯南北關皆去太原五驛約以三道並進時命將節制不專皆得專達河東察訪使張灝坐違制與金人戰於文水而敗及潛戰於南關韜引兵皆潰八月丙申復命師道宣撫召綱還丁未金人復分道

入寇初犯真定爲思正等所敗已西復戰師潰死者數萬思正奔汾州可求兵亦潰於子夏山威勝隆德汾晉澤絳民皆渡河南奔州縣一空金人乘勝攻太原庚申遣王雲使金軍許以三鎮賦入之數九月丙寅太原陷執孝純王稟通判方笈死之甲申日有兩珥背氣丙戌建三京及鄆州爲都總管府分總四道兵冬十月丁酉金人陷真定都鈐轄劉輿死之庚子日有青赤黃蔽氣又陷汾州知州張克戢兵馬都監賈竄死之陷平定軍上以太原真定咽喉之地已失大爲憂慮辛丑下哀痛詔命兩河互相救援諸路合縱連衡皆得便宜行事見便而動無拘一律丙午集從官太常禮官議割三鎮并金主尊號召師道還代以金吾衛上將軍范訥爲寧武軍節度使宣撫兩河馮濟知樞密院事王寯免丙辰陷平陽府并威勝隆德澤州十一月解罷

辛未有流星如杯粘沒喝自澤潞至河陽宣撫副折彥質拒之
領師十二萬皆潰遂渡孟津知河陽燕瑛西京留守王襄棄城
遁提刑許高統兵防洛口亦潰京師戒嚴乙亥命康王復使幹
離不軍馮澥李若水使粘罕軍許以割地奉袞冕車輅尊金主
爲伯上尊號十八字丁丑李回防河兵萬人潰歸是日塞京城
門戊寅進婉容韋氏爲賢妃復改康王安國安武兩節行至磁
州止王勿行乃復還相州湯陰人岳飛來見王以爲承信郎乙
酉幹離不軍抵城屯於劉家寺自恪與南仲散諸路授兵城中
惟衛士及弓箭手七八萬人閒以蠟書出關召兵約康王及河
北守將來援多爲邏兵所獲不能至丁亥大風發屋折木罷李
回戊子金人圍城攻通津門范瓊出兵焚其砦閏月壬辰朔金
人攻善利門統制姚仲友禦之粘罕軍偕至屯於青城攻朝陽

門帝被甲登城分四壁守禦復攻通津門遣數百人縋城焚其
鵝車炮架丙申帝親如宣化門乘馬行泥淖中又幸安上門召
見張叔夜令將兵入城金陷拱州執東道都總管胡直孺丁酉
有赤氣亘天戊戌金人攻宣化門王宗澁與戰城下統制高師
旦死之癸卯攻南壁叔夜范瑒分兵襲之金兵奔還自相蹈藉
溺隍死者千數甲辰大雨雪士卒寒噤有僵仆者帝在禁中徒
跣祈晴金攻城急遣馮澥曹輔與宗室仲溫士誦祈請緩師命
康王爲天下兵馬大元帥速領兵入衛辛亥金要親王出盟壬
子瑒率千人出戰渡河水裂沒者過半自是士氣益挫甲寅大
風雨雪乙卯金復使劉晏來趨親王宰相丙辰京城陷金兵登
城焚南薰諸門姚仲友死於亂兵統制何慶言陳克禮中書舍
人高振率家人力戰皆被害帝始慟哭悔不用种師道言衛士

入都亭驛執殺劉晏何奩欲率都民巷戰南仲止之丁巳上皇
驚憂寢疾與后偕入居延福宮命奩及濟王栩使金軍奩邀上
皇出郊帝曰必欲上皇朕當親往時雪尚不止是日霽夜有白
氣出太微彗星又見長竟天庚申日赤如火無光辛酉帝令孫
覲撰降表如青城十二月癸亥帝還宮掩面大哭曰宰相誤我
父子甲子大索金帛丙寅遣陳過庭劉韜使兩河割地是歲夏
人取天德雲內武州及河東八館陷鎮威城攝城事朱昭死之
又陷懷德軍知軍事劉銓通判杜翊世死之遼故將小鞠鞞陷
麟州建寧砦知砦楊震死之高麗入貢恐窺我虛實令明州遞
表以進遣其使還 二年春正月粘罕知康王開府恐諸郡不
肯交地令趨召王還甲午詔三鎮令閉門出降民堅守不奉詔
乙未有大星出建星西南流入於濁没丁酉雨木冰己亥陰曠

風迅發夜西北陰雲中有如火光庚子命孫傅輔太子監國帝復如金師宰相以下皆從都城百姓號哭扳留范瑔軋斷其指金人議立異姓留帝青城逼以易服吏部侍郎李若水抱持而哭曳出死之除親王宰執以下餘並令先歸丙午劉韜自經殺上書人太學生徐揆塹南薰門路都人大恐丁未大霧四塞二月吳玠莫儔自金營持文書至令推堪爲主者從軍前備禮冊命仍邀太上皇后其妃主宗室悉從內侍鄧述具名自鄆王楷以下及諸孫妃駙馬并六宮有位號者皆如軍前獨孟后廢居私第獲免開封尹徐秉哲令坊巷五家爲保無令藏匿瑔逼太上與后皆乘輦車又逼召皇后太子吳革欲微服衛太子潰圍而出孫傅不從謀匿民間又不成遂率之同詣金營三月丁酉金人立張邦昌爲楚帝革率衆謀討之不克而死夏四月庚申

朔大風吹石折木金人分道以二帝及后妃太子宗戚凡三千人由汴北去其法駕鹵簿皇后以下車輅冠服禮器法物大樂教坊樂器祭器八寶九鼎圭璧渾天儀銅人刻漏古器景靈宮供器太清樓秘閣三館書天下州府圖及官吏內人內侍技藝工匠娼優府庫蓄積皆盡凡歷九帝一百六十七年而亡 帝踐祚僅一年在東宮不見失德凡先朝好尚一無所預罷內外官司局所一百五處以儉約示天下先澄汰貪冗爲民驅害廢苑囿宮觀以益民除元祐元符黨籍學術及上書邪等之禁追封范仲淹司馬光呂公著陳瓘等錄其後裔正六賊罪臬童貫首蔡京子孫并梁方平譚稹趙良嗣相繼誅籍削高俅李邦彥李稅鄭望之等官置詳議司討論祖宗法度一切除授黜陟恩數政令悉遵舊制罷宰執兼神霄玉清萬壽宮使省廉訪使者

明堂頒朔布政官及六尚符寶卿以諸路贖學絕戶田歸常平
司凡開邊防河開疆改幣公田應奉獻頌獄空恩例道官處士
先生贈補勅書悉追奪之親擢諫官宰執勿得薦舉復置春秋
博士開經筵令士民講孔孟之法罷安石邪說以詩賦取士禁
川黃老雖暇日百司毋得休務故金人聞帝內禪有卷甲北旆
之意所恨執德不堅信任不篤以城門開閉爲言路通塞今日
川李綱明日罷之朝納种師道夕以姚平仲挫之迹其所爲倘
在位日久必蹈覆轍雖以伊呂復生孫吳輩出無可奈何而况
白時中徐處仁唐恪何栗之徒甘心喪亡張邦昌王時雍徐秉
哲范瓊攘臂助賊論者無徒憫其受禍之慘也

冊曰天道無私積有餘殃雖存片善莫救其亡重昏之號
真可痛傷

弘簡錄卷九十一終